



AmirEleslam

Presents:



DvD4Arab Library



AmirEslam

سموا كده و خليكوا معايا واحدة واحدة...خلينا نتفق الأول ان موضوع الجواز و العرسان و تأخر الجواز ده موضوع حساس جدا..وصعب جدا انكوا تلاقوا حد بيتكلم فيه بصراحة..خصوصا بالنسبة للبنات...لأن اللي بتتكلم فيه بصراحة يا إما بيتصلها على إنها قليلة الأدب و ماتربتش..يا إما على انها مسروعة ع الجواز..يا إما على انها بارت و مش لاقية حد يتجوزها..عشان كده تلاقوا بنات كتير بتقول..جواز ايه بلا نيلة..يعني هم اللي اتجوزوا كانوا خدوا ايه..انا قاعده في بيت أبويا معززة مكرمة, ايه اللي يخليني أروح أتبهدل مع حد ماعرفوش..أنا ما بأفكرش في الجواز دلوقتي لما أبني مستقبلي..و الجملة المستهلكة في كل الأفلام العربية.. "لما أحقق ذاتي ""...مش عارفه ايه ذاتها دي و تحققها ازاى يعني

يمكن فيه بنات كتير ليهم طموح في دراستهم و في شغلهم..لكن أتحدى ان أي واحدة فيهم مايكونش طموحها الأول انها تبقى زوجه..على الأقل لأن دي الطريقة الوحيدة اللي تخليها تبقى أم

نتفق بقة على أسس تانية مهمة.... عدد البنات في مصر أكبر من عدد الرجاله

..مش تيجي تسلم على بنات خالتك شوف بقوا حلوين إزاي؟..أنا مش طارق يا طنط
و أنا متهيألي كده حضرتك مش خالتي...صحيح؟ معلش يا حبيبي العتب ع النظر
طب ما تعرفنا على نفسك كده ..يمكن ربنا يحبك و بيقالك نصيب معانا

طبعا الواد يا إما بيطلع يجري ..يا إما حد من صحابه بياخد باله م الكمين اللي وقع
فيه ويجي ينقذه على أساس في حد عايزة و كده

طبعا ده غير اللف اللي بيعدوا البنات يلفوه حوالين العروسة عشان بيقوا واضحين
لكل اللي في القاعة من كل الجهات ..و لما بيقف اللف تلاقهم يزقوا في بعض أو
يعملوا انهم بيعدلوا للعروسة فستانها أو طرحتها عشان يطلعوا في الفيديو..و يحاولوا
يطلعوا في أكبر عدد ممكن من الصور ..يمكن يعجبوا حد و يتكل على الله و ينتشلهم
من عالم الأنسات

الكلام ده كله على فكرة مش المفروض تضحكوا عليه..و الله البنات دول غلابة
..زمان ما كانش مطلوب من أي بنت غير انها تحترم نفسها و تقعد في بيت أبوها و
تستنا العدل اللي بيكون في الغالب من إختيار أهلها
دلوقتي الكورة بقت في ملعب البنات ..يعني لازم تخرج و تشتغل و تروح أفراح و
تزور أصحابها لأن مسؤولية إحضار عريس بقت ملقاه على عاتقها بالكامل ..أنا
أعرف حالات كثيرة أهل البنات بيتخانقوا معاهم خناقات لرب السما عشان يخرجوا
و يشتغلوا يا إما عمرهم ما هيتجوزوا .. و م الجهة الثانية المجتمع في حالات كثير و
خصوصا خارج القاهرة و الأسكندرية مايبيرحمش أي بنت تخرج مع راجل عشان
تتعرف عليه و يمكن يبقى فيه نصيب ..ده غير ان الراجل نفسه في الغالب ما
بيرضاش بيها و يقولك عايز واحدة خام لا خرجت و لا اتكلمت مع حد غيري

طب بدمتكوا البنات يعملوا ايه...ده غير العداد اللي بيعد من أول ماتتخرج من
الجامعه...يعني البنت تعتبر بدأت تعنس من أول ما يعدي عليها سنتين أو ثلاثة
متخرجه و لسه ماتخطبتش
أنا شخصيا بدأت أحس اني هاعنس من أول ما كملت 23 سنة..طب نعمل ايه

بصراحة المجتمع المنيل اللي احنا عايشين فيه و اللي بيقيمالبنت بجوازتها واللي
تتجوز بسرعة تبقة شاطرة واللي تتأخر يبقى فيها عيب ..و ع الجهة الثانية الراجل

من حقه ينقي و يتشرط و يبقى مقطع السمكة و ديلها و يتقال عليه مفتح و مدقق..و
يبقى معدي الأربعين و من حقه يتجوز في أي وقت انشالله واحده عندها 18 سنة

المجتمع ده ظالم و مفتري ..و البنات غلابه و الضغط عليهم بيزيد كل يوم والناس
بتحاكمهم على حاجه مالمهمش يد فيها

خليكوا معايا بقه ..م المرة الجايه كل بوست هاحكيلكم على بلوة م البلاوي اللي
اتقدمولي ..عشان تعرفوا احنا بنستحمل أد إيه

سلام

الأول

حلو العنوان كده زي ماكان انور وجدي بيقول في "أمير الإنتقام" ..أصل الموضوع
كله أصلا تحس انه فيلم عربي ..بس اول موضوع ده كان فيلم هندي و كوميدي
كمان

واحدة صاحبتني كانت لسه متجوزة قريب و كنت لسه حاضرة فرحها من أسبوعين
..أتصلت بيا تظمن عليا يعني ..كنت لسه سامعه خبر ان واحده من أصحابنا جابت
عريس لواحدة تانية صاحبتنا برضه ..و ده موضوع يضايق قوي على فكرة ..يعني
تفضل الواحده تقول و اشمعنى يعني ماخارتنيش أنا و مش بعيد تقاطعها و
ماتكلمهاش ثاني أبدا

أنا بأه مسكت صاحبتني اللي كانت طالباني في التليفون و قعدت أرصلها ,,شايفة
الصحبات ؟..ماطلعش منك انت حاجه زي كده ..أمال مجوزينك ليه؟ مش عشان
تشوفيلنا في اصحاب جوزك و الا قرابيه حد ينفع ..و كل شوية صاحبتني دي تحاول
تقاطعني و تسدني و انا ابدا منطلقه زي الصاروخ ..لحد ماراحت موقفاني بصرخه
..يابت اسكتي بأه جوزي ببسمع م السماعه الثانية و عايز يتأكد انك كويسة و رقيقة
عشان جايبلك عريس

هو هو الحوار في كل المستويات ..ولا يوجد اي نجاح في اي مجال يقدر يحل محل
الزواج بالنسبة للبنات الشرقية...طب و اللي مش لاقية و اللي فاتها القطر و اللي
بارت على رأي الناس مابتقول ...يبقى مالهاش لازمة ..تروح تولع في نفسها يعني؟؟
هي غالبا ما بتبقاش مستعدة لا نفسيا و لا علميا و لا اقتصاديا للحظة دي ..كل الناس
بيقولولها هنتجوزي يعني هنتجوزي ..و ساعة لما مايحصلش .مابتلاقيش حوالها
غير نفسها و بس

بعد ماالنسبة زادت و بقى عدد اللي لسه قاعدين بالملايين..لازم كل البنات يحبوا
نفسهم و يدوروا ع النجاح في كل الأماكن و يعيشوا حياتهم على انها حياتهم مش
على أساس انها تنتر لمسلسل لسه مابتدأش

ولازم المجتمع يبطل يحصر البنات في دور العروسة و بس ..لأنه وقت الجد مش
هيقدر يعلها حاجه و هيبقى هو اللي جنا عليها لأنه فهمها ان ده الطريق الوحيد و
مافيش غيره..و هتחס ساعتها ان مالهاش لازمه و انها صفر ع الشمال و هتيجي
تعمل بلوج زي كده و تقعد تشتكيلكم

وانا من هنا بقولها ..لو ماحصلش ..لو ماتجوزتش وما جبتش عيال و ماقدرتش اتبع
خطة المجتمع ...أنا برضه ليه شخصيتي و حياتي و مش هابقي أبداصفر ع
الشمال

الثاني

ما احنا قلنا هنمشيها زي أنور وجدي بأه خلاص

بصوا بأه ..أولا الحكاية دي برضه من فصيلة هم يبكي و هم يضحك ..بس الصراحه
يعني الصراحه ..انتوا هتضحكوا عليا أنا..هتشوفوا ..بس بقولكوا ايه بما اني فتاه
ركيكة ..قصدي رقيقة رقيقة..و مهيزة الجناح..ههه حلوة مهيزه دي..فبليز بليز
..بلاش تريقة

الحكاية دي مايعرفهاش أي حد غير انا و ماما ..ماحكيتهاش لأي حد من أصحابي ..يعني ابقوا اتفشخروا قدام كل أصحابكم بالأمتياز ده ...حصريا على بلوجر ..حكاية العريس الثاني ل عايزة أتجوز ..إقرا الحادثة ..إقرا الحادثة

احمم..مقدمة...عارفين ايه احساس واحد و هي ماشية في الشارع و تحس ان حد معجب بيها..مش معاكسه يعني و كده ..لأ بيبقى فيه كده كيميا زي مايقولوا الأجنب ..و على فكرة فيه جوازات كتير بتبدأ كده ...واحد يشوف واحد في الشارع..يمشي وراها ..يعرف ساكنة فين و يسأل عليها و يخطبها ..ابن عمي عمل كده و البت لسعته حنت قلم على وشة ..علم على صداغه 3 أيام ..قام هو اتكيف قوي و قال البت دي واضح انها مؤدبة و متربية وراح خطبها ..آه و النعمة..هي صحيح بعد كده اتضح ان ايديها بتطول عليه في كل المواقف مش في الموقف ده بس ..بس و الله الرجل مبسوط و بيحلف باليوم اللي شافها فيه..و بيلعن أبو ...والا بلاش دي في مقام عمتي برضه

المهم أنا يوم نازله من البيت رايحه الشغل..حسيت بكيميا م اللي كنت بقولكم عليها دي ..حسيت ان فيه عين هتخرم قفايا ..اتديرت بسرعه كده في الخباثة لقيتكم راجل انما ايه ..طول بعرض بارتفاع.ماسك ف ايده شنطة سودا و لابس بدله و كرافته و نضارة شمس....عامل كده زي العيال اللي كانوا بيطلعوا في إعلانات جمعية شباب المستقبل بتاع جمال مبارك "شباب الجيل ..قوام جينا ..هو ..هو " فاكريتهم؟..المهم الواد كان حلوية و انا قلبي ههفله أول مالمحته ..استنيت شوية ع المحطه و بعدين جه الميكروباص..ركبت راح راكب ورايا..قلت الشياكه دي كلها هتركب مكروباص ليه يعني..أكد في الأمر إنا ..و جه كمان قعد جنبي ...يا حلولي يا حلولي..بس كنت خايفه ليعاكس و ساعتها أنا ماعرفش أبويا ..باللي ف رجلي و لايهمني لا شباب المستقبل و لا جمال مبارك و لا حاجه أبدا..بس لاقيته في نص المسافه كده ..بيميل عليا و بيقول باسلوب رزين كده ..لو سمحتي ممكن أسأل حضرتك على حاجه ..وانتوا ماتعرفونيش... باتسطل لما حد يقولي حضرتك ..بس برضه مش سهله يعني..صدرت الوش الخشب و قلته ..خير بمناسبة ايه؟..يعني كنت عايز أسأل بس ..هو حضرتك مرتبطه ..واضح انك مش مخطوبة و لا متجوزة مافيش دبل في ايديكي ..بس الإرتباط بأه لازم أتأكد منه من حضرتك ..(حضرتك تاني يا حلولي)..والله الكلام ده ماينقالش في مواصلات و بعدين انا ماعرفكش و مش متعوده أكلم حد ماعرفوش ..طب يعني أنا لو معجب بحضرتك و عندي نيه أتقدم رسمي ..أعمل ايه ..أصلي بصراحه متابعتك من مده بس دي أول مرة أتشجع و أحول أكلمك ..ياحلاوة يا حلاوة متابعتي من زمان ..ده واقع بأه..بس برضه على مين ..لازم

بصلنا و ابتسم ابتسامه انيقة و هزلنا راسه اقعدوا اقعدوا
قعدنا قداموا مبهورين بنبصلوا زي ما مرات عم محمد البواب بتبص لجوزين
الغوايش بتوع مرات عم مصطفى المكوجي
قاعد هو ع اكرسي اللي في وش الكرسي اللي انا قاعده عليه..قعد يبصلي كده و
يبص للفازة اللي ع الترابيزة اللي في وسط الصالون و فجأه بدون مقدمات راح قايم
شايل الفازة بالورد اللي فيها و حاطتها ع البوفيه..وقاعد تاني
بابا بصله و ال1111 ظهرت على وشة واضحة جلية_ ملحوظة بابا بيظهر على
وشة 1111 مش 111 زي الناس العادية خصوصا لما بيبقى متغاض-بص لبابا و
ابتسم برضه الإبتسامه الأنيقة:أصلي مش عارف أشوفها كويس..

دي طبعا اللي تبقى أنا..ومش عايزة نباهة هو كان شايف وشي يبقى كان عايز
يشوف...يا نهار اسود ...و واضح ان بابا كمان وصل للنقطة دي بتفكيره لأن
حواجبوا كانوا خلاص قربوا يندمجوا و بيقوا خط واحد طويل فوق مناخيره اللي
احمرت و بقه اللي كان مكرمش لأنه واضح انه بيجز على سنانه
ماما مدت ايديها و طبطبت على ايده يعني استنى لما نشوف أخرتها ايه
بابا بصلها يعني ده واضح انه بجح و عينه يندب فيها رصاصة
رفعت حواجبها وانتهدت يعني الرجالة كلها بقت كده ..جيل الدش يا سيدي

كل ده و اختكوا قاعده غرقانة في عرقها و هو مركز قوي مش عارفه في
ايه?...ومش عايزة أعرف
وفجأة برضه و بدون مقدمات تاني اتفتح في الكلام ..
لو سمحتي ممكن أعلق على حاجه ..وبيشاور
بابا اتحرك بتحفز عشان يقوم بتصرف أبوي لطيف و ينط في كرشه و ماما شايفها
بدأت تطلع رجلها من الشوز تحسبا لإحتمال استخدامها كدعم معنوي بابا يحتاجه

تعلق على ايه

ضوافرك

هاه؟

ضوافرك

مالها

انتي ليه بتقصيها مدوره مش عارفه ان المربعه هي الموضه
هي الموضه في الذهب ايه دلوقتي الأصفر والا الأبيض؟
بس اللون الأبيض اللي انتوا داهنين بيه الأوضه ده هايل و اللون اللي انتوا داهنين
بيه البيت كمان
هو البيت ده تملك والا ايجار؟

ايجارات الشقق بقت غالية قوي على فكرة اليومين دول
اليومين دول ساقعه شوية باين الشتا داخل بدري السنة دي
انتوا عارفين ان السنة دي سنة خبيثة أصل انا مواليد تسعه و عشرين فبراير وباحتفل
بعيد ميلادي كل أربع سنين مرة هاهاها
..مرة واحد جه يقعد على قهوة قعد على شاي هاهاهاها
الشاي بتاعي خفيف يا طنط على فكرة و بمعلقة سكر واحد
ماما بعد ماتاكدت انه أهبل صدرتله الوش الخشب..الشاي خلص من عندنا يا حبيبي

الشاي خلص ..طب خلاص نخليها قهوة
هي القهوة اللي تحت البيت دي مش عاملاكووا از عاج
اصل از عاج الناس ده اسوأ حاجه في الدنيا خصوصا الكلام الكثير
كثير قوي المكياج اللي انتي حطاه يا أنسة..
أنسه انتي برضه ماقولتليش اسمك ايه ..الإسم دايما مهم
القسم بقه اللي جنبكووا ده بيحميكوا كويس بيخوف الحرمة يجوا الناحية دي..أصل
الناس خلاص هتاكل بعض
هو انتوا هتاكلوا ايه النهارده انا شامم ريحةملوخية بالأرانب
الأرانب بقت سهلة دلوقتي على فكرة الواحد يدخل بميت جنية في البورصة يطلعوا
بأرنب.. مليون يعني
مليون مرة أقول لطنت شكرية عايز عروسة مش عارف اتأخرت ليه على ماجابنتي
هنا
بابا فرمله :
أنا عارف..بره

نعم يا عمي قصدك السفر بره لأ انا مش ناوي أصلي

بررره..أطلع بره ماعندناش بنات للجواز

هاهاها ..بتهزر يا عمي ..أمال دي ايه..يا جماعه حد
يقوللي اسمها ايه ..هاتجوز واحد ماعرفش اسمها

انا قلت بره ماعندناش بنات للجواز

مش فاهم حضرتك بتتكلم بجد.بتهزر أكيد مقلب..
آه شوفتوا برنامج مقلب دوت كوم

و هنا قرائي الأجزاء وصل ارتفاع الضغط ببابا حدا لم تشهده البلاد من قبل و قام و هو الذي يبلغ طوله 170 سنتي و عمره 62 سنة بحمل البية العريس المترين و نص ده هيللا بيلا من الصالون لباب الشقة و زقله ع السلم و سمعناه بيتدحدر رج دحدر رج رزيبيينة جدددا

و العاقبة عندكم في المسرات

أسئلة مجناني

بصوا باه انتوا صحابي

عشرة يعني يجي 3-4 شهور كده

جاوبوني لو سمحتم على شوية أسئلة بتزن في دماغى زي الناموسة اللي دخلت دماغ

قارون و قعدوا يضربوه بالجزم على نافوخه عشان يموتوها و في الآخر موتوه هو

مش عارفين موضوع الناموسة ده .. هابقى أحكيهولكم بعدين

المهم أفهم باه

هو ليه لازم بيقة فيه فرق كبير في السن بين الست و الراجل المتجوزين؟

ايه الفكرة يعني؟... الراجل يعني بيبقى متحكم في الست عشان أكبر منها؟

طب هو مين في مصر بيمشي كلمه على مراته؟

طب لو أكبر منه... مستحيل

طب لو قده بالظبط.. مش ممكن

طب لو هو أكبر منها بشهر أو اتنين أو حتى أربعة... لا برضه ولو.. ده حتى سنة

بحالها مش كفاية

طب ليه؟؟

مش ساعات كتير تشوف شباب صغير في السن و شخصيته أحسن بكثير و أقوى من

واحد عدى الأربعين

و ساعات واحده 55 أصغر منك بعشر سنين و تمشيك ع العجين ماتلخبطوش؟

يعني مش مسألة سن

يبقى ايه الفكرة المتأصلة .. المتمكنة .. المستقرة .. المستمرة في دماغنا كلنا في

الموضوع ده

طب حاجة تانية

ايه بعبع التلاتين ده؟؟

ليه اللي عندها 30 سنة تبقى عنست و اللي عندها 29 يبقى لسه؟
اشمعنى يعني الراجل لحد الأربعين يبقى صغنتوت و قمر و حبوب
و البننت تبقى قرشانة و عانس و فاتها القطر؟؟
قطر يبقى يشيل اللي يقول كده انشاء الله
طب سؤال كما ان
نقلت عليكم ..معلش

ليه بأه كل واحد حتى لو عنده 38-40-45 سنة عايز يتجوز واحده عندها 22؟
مالها اللي عندها 25 و الا 26 و الا حتى 30...كخة؟
عايزها صغيرة ليه يعني...تبقى روضة ..مش ضروري ممكن تبقى قفل
تبقى خام و معرفتش حد قبل كده...ماتلاقيش يا فندم مش مضمونة حتى لو عندها 14
سنة.. ممكن لأ ..بس برضه ممكن أه
هتخلفك عيال كتير...مش ضروري برضه ...يا أخي ده كله بأمر الله
أمال ايه؟

ايه الفكرة في الكلام ده كله؟
انا مش بس باعترض ..فهموني يمكن أفهم معاكوا
كان ممكن أعملها تاج و أكتب 5 أسامي يعملوه بعدي و ناس يعملوه مجاملة عشان
مايخرجونيش
و ناس تحلف ماهي عاملاه و تقول ..هي فاكرة نفسها ايه يعني تقولي أعمل التاج
أقوم عمله على طول؟...هزلت

فمن غير تاج و ماتاجشي لو سمحتوا جاوبوني و فهموني أسباب الكلام ده ايه
و الا هيبقى مصيري زي مصير قارون أو شجرة الدر

الإعدام ضربا بالبقايب

تصحيح

اللي اضرب بالجزم على نافوخه هو النمروود مش قارون..الشكر لمصعب الخير و
أكتب بالرصاص على التنبيه

الرابع

أولا أسألکم سؤال...بقيت رخصة أنا و اسئلتني كتير أنا عارفة
سؤالي هو....انتوا بتعملوا فيا كده ليه؟
هتبقوا انتوا و الزمن؟
انا قلت أعمل بلوج و ألاقى ناس تفهمني و تصبرني

يقوم كل شوية حد يطلع يقوللي يا رب ماتتجوزي عشان تفضلي تكتبي..يا رب
تفضلي كده على طول عشان نفضل نقرالك

ليبييه يا جمااااه كده؟
ليه عايزين توقفوا حالي..هو جوازي يدايقكوا في ايه؟
اكونش خديجة و مش عايزينها تتجوز جيمي؟

غريبة والله؟

ياللا معلش..يمكن دعوات الناس اللي بتقول يا رب تتجوزي تعادل دعوت اللي
بيقولوا يا رب ماتتجوزيش
و حمض+قلوي=ماء+ملح
و ملحه في عين اللي مايصلي ع النبي

.....
سؤال كمان بأه...آخر سؤال و حياتكم

افتحوا ورقة الأسئلة و امسكوا الأقلام
اذكر خمس أوجه للتشابه بين طنط شكرية و تنظيم القاعدة

ايه؟
غلب حماركم

أقولكم اللي قدرت اتوصلله من اوجه التشابه دي

أولاً:الإثنين سواء اختلفنا معاهم أو اتفقنا(ممكن على فكرة تتفق مع القاعدة بس طنط
حشرية مستحيل)أيا كان..الإثنين نتيجة أفعالهم انفجارات و دمار و غالباً بيبقى فيه
طرطشة دم كمان

ثانياً:الإثنين ممكن يغطسولهم شهر..اتنين..تلاتة و يمكن سنة و بعدين يطلعولك بقنبلة
أكبر من اللي قبلها

ثالثاً : انهم الإثنين ساعات بيقى التفسير الوحيد ليهم هو نظرية المؤامرة
القاعدة ساعات يتهياألنا انها من صنع امريكا..و طنط حشرية ساعات يتهياألني انها
بتعمل اللي بتعمله ده عشان يمكن زمان كان عينيها من بابا و دلوقتي فرصة تنتقم
منه و ترفعه الضغط

رابعاً و خامساً : فكروا فيها انتوا بأه انا بصراحة مافياش مخ

.....

انا بأه كنت قاعده كده فوق المقطم و قدامي كريم متشحتف و عيينه حمرة زي
الطماطماية من كتر الدموع

أرجوكي يا بر ايد لازم نتجوز انا مش هاقدر اعيش من غيرك
مش عارفة أقولك ايه يا كريم الموضوع خلاص خرج من ايدي
طب انا مش فاهم ليه باباكي كارهني؟
اعمل ايه بس يا كريم ..حاولت و الله حاولت كتير و مافيش فايده
طب بس خليني أقعد معاه و انا اكيد هاقنعه
تقنعه ازاي بس يا كريم انت عارف بابا ما عندوش تفاهم
طب يعني انا ذنبي ايه انه شافني و انا باحضن منة و هي لابسه القميص الأحمر؟
هو بابا بس اللي شافك دي مصر كلها شافتك
طب أعمل ايه بس؟
هو فيه حل واحد
ايه هو؟

.

.

.

ماتجيبهاش معاك في الفيلم الجاي

فجأه المقطم كله بيتهز ..بر ايد..يا بر ايد
أيوة يا كريم أنا معاك اهه
كريم مين؟..الله يقطع كريم عبد العزيز اللي هيجننك ده
الله ..مين اللي بيهز الجبل؟
جبل ايه يا هانم..قومي انا مامتك ..قومي يا بنت تعالي شوفي طنط حش..كرية..جايه
عايزاكي في موضوع
قمت بتأثير الصدمة من النوم
بأه يا ربي أجي من المقطم و أسيب كريم عشان طنط حشرية دي؟
بس يا بت بلاش قلة أدب ..قومي البسي يالا و طشي وشك بشوية مائة و تعالي قابليها
يا فتاح يا عليم يا رزاق يا كريم

.....

ازيك يا طنننط

أهلا يا أمورتني..من غير كلام كتير يا بر ايد..جايبالك حنة عريس
عارفة عارفة ..راجل و رأيه من دماغه و أبوه تكاثر ذاتيا و جابه لوحده

بعد النشر في الأهرام و من وراه الدستور و موضوع إخوان أون لاين و الشهرة اللي
نزلت على أختكم من غير ميعاد ..مش الناس بأه تباركلي و تهنييني على الكلام ده؟
لأ ازاي؟

و مصداقا لقول الشاعر الجاهلي القديم

الكحكة في ايد اليتيم عجة

النم و القر اشتغل ..و كانت النتيجة الحتمية هو رقودي في السرير خلال الإسبوعين
اللي فاتوا بين الحيا و الموت
جسمي مولع من الحمى و امد ايدي و هيا بترتعش و أشاور ع الكمبيوتر
أوج..أوج..يعني البلوج
ماما تططب عليا و تقوللي ..سلامتك يا برايد ..بتخترف م الحمى يا عيني
ده الكمبيوتر يا حبيبتي مش الأورج..لا حول ولا ر قوة الا بالله

أمد ايدي و أشاور تاني
أنة..أنة..يعني المدونة
بابا يصرخ و هو ماسك دموعة بالعافية..يا جماعة شوفوا حل ..البنت هتضيع معنا

الواد محمود سلوع جارنا اللي في كلية الطب يعدل النظارة على أرنبه مناخيره زي
اونكل فتحي سرور و يقول
أنا شاكك انها حالة انفلونزا طيور
البت هند اللي عندها 6 سنين بنت أماني جارتنا اللي هيا أصغر مني ب3 سنين
..تتنطط على السرير و تقول
هيبه هيبه طنط برايد هتبييض

و انا أصرخ فيها
تي..ات..اسن..وم..سك..تي..مك
يعني اسكتي يا بت بدل ما أقوم أهرسك انتي و أمك

أماني تشد البنت من قدامي و تقول..جايز برضه يا عمو ..انتوا كلتوا فراخ قريب

يا بنتي من ساعة العيد و احنا بناكل في لحمة الخروف

الواد محمود سلوع يقرب من بابا و يحط ايده على كتفه
أنا عايزك تفكر كويس يا عمي قبل ماتجاوبني

هي دي إشارة بدأ اليوم عندنا في مكتبنا..حاجة كده زي تحيا جمهورية مصر العربية
اللي كنا بنبدأ بيها طابور الصباح زمان
بعد الكلمة دي ما بتتقال الصبح تحسوا ان عاصفة الصحراء ضربت مكتبنا
مرايات بتتفتح إقلام روج من كل لون و نوع بودرة كحل ..طرح بتتفك و تتربط تاني
شعور بتتساوى و كل الإستعدادات الأنثوية اللي بتقوم بيها ست الحسن قبل ما تقابل
الشاطر عبد الحميد كانت موجودة في اللحظة دي

كل ده عشان أيمن..أيمن مين ..أيمن ده الموظف الوحيد من جنس الرجال اللي
موجود في مكتبنا ..تخلوا كده 14 صيدلانية على وش جواز(و على وش جواز دي
فيها قولان) و معاهم أيمن

لأ و مش أي أيمن ..ده أيمن عريض المنكبين قوي الجبهة طويل القامة واسع
الإبتسامة عميق العينين حاد الأنف..باختصار كده كل الأوصاف اللي نبيل فاروق
بقاله عشرين سنة مزهقنا في وصف أدهم صبري بيها..موجودة في أيمن ده و بالتالي
فهو بصراحة يستحق كل الإستعدادات دي

أههههههه-دا أنا ...باتنهد-.المهم بعد عاصفة الصحراء دي دخل أيمن
المكان..ماحدث قدر يبص بطريقة مباشرة لأن كل شئ فيه كان بيلمع.. الشعر
.البسمة .الجاكت الجلد و. الشوز الملمع كان صعب تبصله مرة واحدة..مش هاتقدر
تفتح عينيك(بالغيظة في هالة زرقان) و ريحة البارفان اللي هبت على المكان..خلت
اتنين يفقوا النطق و ثلاثة يفقدوا الوعي وواحدة كان عندها استعداد تفقد أكثر من كده
لو كان حد اداها فرصة

صباح الخير يا جماعة

تمكتنلاربيةلالف

دا إحنا بنرد بكلام غير مفهوم مع فاصل من الهقهقة اللي مالهاش لازمة

وقف أيمن يبص كده شوية في المكان و يلف بعنيه في المكتب و فجأه بصلي..و
اتسعت ابتسامته قوي و لمعت في الشمس لدرجة اني أصبت بعمى مؤقت و بعدين
..و بعدين .. يا دي النيله دا جاي نحيتي..طب أروح فين و الا أعمل ايه؟
عملت نفسي مشغوله في الورق اللي قدامي بس على مين؟..برضه جاي ناجيتي و
الكل بيبص و فجأه جسمي كله غرق في عرقه

كمية العرق اللي عرقتها ساعتها كان ممكن تحل مشكلة الجفاف في اثيوبيا
أما وشي بأه ماحيلكوش ..وشي بأه أحمر لدرجة اني لو كتبت عليه 22 الناس
هتفتكرني أبو تريكة

ميل و سند على مكتبي و قال بصوت واطي

صباح الخير

هه؟...ايه؟..آه..آه..طيب

انا ممكن أتكلم معاكي شوية؟
معايا أنا..إحلف..أ..أ..أ..قصدي ليه خير في حاجة
لأ خير انشاء الله

قلت و انا بحاول أوقعه عشان يعترف..بخصوص ايه يعني
بخصوص حاجة كويسة انشاء الله ..حاجة ليها علاقة بالمستقبل
فستان أبيض و زغاريط دبلة و شبكة.. سعد الصغير بيغني و نوال بترقص ..كل ده
مر في خيالي في اللحظة دي
نوال مين؟..نوال دي رقاصة مهمة جدا بس انتوا جهلة ماتعرفوهاش
طيب امتى

بعد الشغل انشاء الله ممكن
طبعا ممكن نتكلم بعد الشغل
دا أنا باعلي صوتي عشان أكيد العزال
بقيت اليوم بأه ..كان يوم تاريخي ..أكني عايشة في فيلم عربي بالظبط..أنا طول
الوقت بابص في الأرض و كل البنات عاملين أحزاب و بيرموا عليا كلام
اتنين ع اليمين..هي فاكرة نفسها ايه يعني كل ده عشان عايز يكلمها و ايه يعني
اتنين ع الشمال بكرة تعملنا فيها نانسي عجرم و ماحدش يقدر يكلمها
اتنين تانيين بيصرفوا للمرضى هو لو يعرفها على حقيقتها ما يبصش في وشها
..اسأليني أنا..خد يا حاج لما تتعب ابقى نقط من دي في مناخيرك

و استمر اليوم على كده تلقيح كلام تلقيح كلام ..ده غير الزغر ..يعني لو النظرات
بتعور كان زمني مرمية في مشرحة زينهم دلوقت الوحيدة اللي كانت واقفة جنبي في
الموضوع ده نهى صاحبتى ..هي الوحيدة اللي كانت مقوياني و بتشد من أزري..على
طول بتبتسم في وشي و تطبطب على دراعي..ربنا يكرمك يا نهى يا رب..هما دول
الصحاب و الا بلاش و كل شوية أيمن يبص ناحيتي و بيتسم ابتسامة زي مايكون
بيقوللي سيبك منهم و لا يهكم و كل اما عينه تيجي في عيني على طول أدير عيني
في أي اتجاه.
الله..باتكسف!!

و نهى كمان ماسابتهمش يستفردوا بيا ربنا يخليكي يا نهى يا رب

و جه ميعاد الإنصراف و لأول مرة في تاريخ وزارة الصحة منذ انشاءها ..الناس
مش عايزة تروح
الساعة جت اتنين ..اتنين و عشرة اتنين و ربع و ماحدش عايز يتحتج من مكانه
نهى عايزة تنتقد الموقف
ايه يا جماعة انتم مش مروحين النهاردة و الا ايه
انا لسه قدامي شوية شغل
و انا احتمال بابا يعدي عليا

انا بأه ماليش مزاج أروح دلوقت اللي عايز يخفى يخفي...قصدي اللي عايز يمشي
يمشي
أيمن يبصلي خلسة كده و باين عليه محرج قوي..و انا قاعدة هاموت ..يا ولاد ال..
هو خلاص يعني..مانتوا هتعرفوا هتعرفوا ..لازم تقفوا في زوري كده؟
فضلت مستنية لحد 2 و نص الا خمسة و برضه ماحدث عايز يتحتح..قلت مابدهاش
باه

خدت شنطتي و قمت من مكاني و مش عارفة ايه الشجاعة اللي نزلت عليا بدون
مناسبة دي رحت رايحة عند أيمن
دكتور أيمن
الواد اتفزع..أيوة
لوسمحت عايزاك

و رحت خارجة بره الأوضة بسرعة و هو ماصدق راح جاري ورايا
سامعة أنا بأه دربكة في الأوضة كل واحدة بتحاول تقوم من على كرسيها بسرعة و
تخرج و رانا تتفزع و غالبا كلهم خبطوا في بعض او اتحشروا و هما خارجين من
الباب خصوصا ان فيه كام واحدة منهم من الوزن الثقيل
وصلت الكافيتريا بتاع المستشفى و بمنتهى الثقة رحت قاعدة على أول ترابيزة و انا
مش مصدقة نفسي
يا حالولي يا حالولي هي دي الكافتريا بأه بتاع الرانديفوهات..يا سلام يا رب ..الحمد
لله كل احلامي اتحققت ..أنا كده ممكن أموت و انا مستريحة
قعد أيمن قدامي و هو خجلان و باصص في الأرض
لا وحياتك مش وقت كسوف دلوقت زمان فيلق البنات كله جاي على هنا و لو جم قبل
ما تتكلم هاقوم أدبح فيهم كلهم و أرمي نفسي م الشباك ولا مذبحه القلعة بتاع محمد
على كلاي

أيوة يا دكتور أيمن..اتكلم اتكلم ..ما تتكسفش
الحقيقة هو الموضوع محرج شوية
يا سلام أيوة كده هينطق باموت انا في المواضيع المحرجة دي..خير انشاء الله
الحقيقة حضرتك عارفة ان انا بقالي 7 سنين متعين ده غير شغلي في الصيدلية بره و
الحمد لله يعني احنا مستريحين ماديا
أبيييبيوة ..هو ده اللي انا عايزة أسمع من زمان..سيبك من بحبك و الا انا
معجب..مادام قاللي انه مستريح ماديا يبقى فيه أمل الموضوع يتم
ربنا يزيدك يا دكتور بس انا ايه دخلي في الموضوع بالطبط
الحقيقة..أأ..أنا ..يعني..كنت بافكر في الإستقرار
هيييبييه...يحيا العدل ..يحيا العدل
هو حضرتك لسه ماستقرتش حقيقي..والا اعرف
لا الحقيقة لسه و من أول ما اشتغلت معاكوا في المكتب و انا الفكرة بدأت تلح على
دماغي قوي

يا سلام يا سلام .. هو ده الكلام
طب وانا دخلي ايه في الموضوع ده
ازاي يعني ده حضرتك أهم شخص في الموضوع ده
الدنيا بتلف بيا يا جماعة حد يسندني لو سمحتوا

ازاي يعني

الحقيقة أنا كنت طمعان ان حضرتك

أبوة

يعني ان حضرتك

أبيبووة

تكلميلي الأنسة نهى

نهى؟..نهى مين

نهى اللي معنا في المكتب أنا لاحظت ان حضرتك أقرب واحدة ليها عشان كده
فكرت إنك أنسب واحدة تكلمها في الموضوع ده
سواطير و ضرب رصاص..مشنقة زي بتاع عمكوا صدام متعلق فيه الزفت ده و
جنبه البت الثانية اللي اسمها نهى دي.و انا ماسكة العصاية و تك تنقطع رقبتهم هما

الإثنين

نهى؟..انت جايبني هنا عشان تكلمني على نهى

الحقيقة مش انا اللي جايب حضرتك هنا ده حضرتك اللي جايباني

نعممم

أبوة دانا حتى خايف ان الأنسة نهى تاخذ على خاطرها وتزعل

انت

يا بني آدم انت مافيش عندك دم؟ والا مابتفهمش خالص ها؟

قمت ساعتها وقفت و عمال الكافتريا ببصوا عليا كأنهم ببشوفوا مشهد من فيلم كينج

كونج

خلاص البعيد غبي للدرجة دي تحيب واحدة هنا..

.حضرتك اللي جايباني.

.بس اسكت ..ماتتكلمش خالص.

.جايبني مرسال بينكم ليه؟.

.مالاكش لسان تكلمها بيه

يا أنسة أنا كان قاصدي بس

قلت لك ماتتكلمش

في اللحظة دي خدت بالي اني واقفة و في ايدي طفاية السجاير اللي كانت على
الترابيزة و الواد كاشش في مكانه و خايف مني و العمال بتوع الكافتريا رافعين
سماعة التليفون و بيطلبوا الأمن يجوا يفضوا الخناقة أو جايز بيكلموا العمال بتوع
المشرحة عشان يبقوا يجوا يشيلوا الميتين
لقيت شكلي مش ظريف قوي خصوصا ان المرضى بدأول يطلعوا من أوضاعهم عشان
يتفرجوا

نزلت الطفاية من إيدي.. عدلت هدومي و طرحتي ..رسمت على وشي ابتسامة كبيرة
عموما يادكتور انت ممكن تبقى تكلم الأنسة نهى وجها لوجه أحسن المواضيع دي
مش عايزة واسطة عن إنك
و لفيت و خرجت من الكافتريا و الواد لسه قاعد متمسر زي ماهو..افتكرت حاجة
فرجعت تاني الواد شافني قام جري استخبي ورا أم طارق بتاعت الكافتريا
آه على فكرة لما تتجوزوا..ماتنسوش تعزموني ع الفرح ..أوكي ..باي بالاي

حصل ايه بعد كده ؟..مش عارفة بالظبط
أيمن..الله يمسيه بالخير بأه ..أيمن راح لييبا ..و يقولوا اتجوز من هناك
نهى..نهى دي صاحبتي و حبيبتشي...أماال..هي الصداقة دي بالساهل
طبعا لأ

ع.ان.س
ضحكنا كثير..هناخد السنة كلها ضحك و الا ايه؟
طبعا الحروف اللي فوق دي بتكون كلمة معروفة و مشهورة و رخمة و بايخة و قليلة
الذوق

مش قلنا مافيش ضحك؟
في المعجم العربي بتاع عمكوا وائل الصحاح اللي هو الحفيد الثالث و الأربعين
لجدكوا مختار الصحاح كلمة عانس دي مرادف لكلمة بايرة و في قول آخر أنها الفتاة
التي فاتها القطر..قطر لما يبقى يلحف اللي يقولها على أي واحدة
الصورة اللي كانت بتيجي في بالنا زمان أول مانسمع كلمة عانس هي صورة زينات
صدقي

بعدها بشوية بقت صورة عائشة الكيلاني(الأثنين على فكرة كانوا في الحقيقة
متجوزين)..

و على الرغم من إننا ساعات نلاقي مزر لسه ماتجوزتش لبعده الثلاثين و ساعات
الأربعين..إلا ان مافيش أي حد بيسميهم عوانس أبدا
يعني مثلا ..ليلي علوي..لطيفة..أنوشكا..كل دول عدوا الأربعين ..ورغم
كده..عمرکوا سمعتوا حد قال عليهم عوانس؟..ماحصلش

يعني مهما حاولنا نعرف الكلمة على إنها تأخر واحده في الجواز هنلاقي التعريف ده
غير صحيح
الكلمة ..مجرد إهانة..فقط لاغير
نوع من أنواع التشفي في واحدة تعرفها أو ماتعرفهاش

خصوصا لو ماتعرفهاش..ياسلااام تبقى كلمة لطيفة جدا و على سبيل الهزار و
التهيبس و حاجة ظريفة تموت م الضحك
بالظبط زي لما تضحك على حد إتسرق مرتبه في الأتوبيس
لو إنت اللي حصلت فيك الحكاية دي تبقى مصيبة سودة ..لكن لو حصلت لحد
تاني..يبقى هو اللي حمار و مايفهمش و دغف و عبيط عشان كده إتسرق

برضه كلمة عانس نفس الطريقة..طب بص حواليك في عيلتك في شغلك في جيرانك
..أكيد هتلاقي واحدة قريبة منك و بتمر بطروف زي دي ..لو هي قريبة منك قلبك
مش هيطاوعك تقول عليها عانس
أما لو ماتعرفهاش..فهتلاقي الكلمة بتجري على لسانك بسلاسة و سهولة

إنت بتقول الكلمة سوري يعني بجهل و ماتعرفش هي بتجرح مين
و ماتعرفش أصلا انها بتجرح

يعني من مدة كده كانت فيه واحدة سايبالي تعليق في الشات بوكس بتقول اني باتكلم
بلسانها و بلسان صاحبها و كده
أم حد برضه جه في التعليقات و قاللي أنا ملاحظ ان كل اللي بكتبولك هنا عوانس
ماتغيري اسم البلوج و تخليه بيت العوانس

سيبكوا مني انا ..هتكلم عن نفسي بعدين..لكن قعدت أتخيل إحساس البنت اللي كتبتلي
الكلام و يمكن رجعت تبص على تعليقي على كلامها و شافت تعليق الأخ ده
تفتكروا هتضحك ..هتهز كتافها و تنسى الموضوع
لو فكرتوا كده يبقى مافيش حد فيكم عمره فهم نفسية بنت
لأن كل البنات تقريبا الموضوع ده بيبقى هاجس جواها من أول مايبندوا صاحباتها و
اللي حواليتها يتخطبوا و يتجوزوا و هي تتأخر حتى لو شوية صغيرين

عن نفسي ..الكلمة بتضايقني لو اتقالت قدامي من أول ما كملت 22 سنة
حتى لما كنت باسمعها في فيلم أو مسلسل كانت بتخنفني

نرجع للتعريف

في الأرياف بتبقى البنت عانس لو عدى على حصولها على الدبلون سنتينفي الأقاليم
زمان كان لغاية 25 و دلوقتي بقت 32-33 في القاهرة و الإسكندرية لحد ال35 و في
كل الحالات..اللي وصلت السن ده و ماعادش بيجيلها عرسان
بالنسبة لكل الأرقام دي و بما إني مش معايا دبلون ..يبقى لسه قدامي شوية على
ماحمل اللقب

و مع ذلك..كل صحفي أو صحفية كتبوا عن البلوج سواء في الصحافة الإلكترونية أو المكتوبة كل اما حد يجيب سيرة البلوجي قول "إنه صرخة من بنت فاتها قطار الزواج"..إنها صيحة من فتاة مصرية ضد حالة العنوسة..إنها صوت الكثيرات ممن حملوا لقب عانس و فيه ناس كمان منكم..بحسن نية..أو غيره..لازم يحشروا الكلمة دي في تعليقهم على أي موضوع في البلوج

لو كنت عارف ان الكلمة بتوجع و بتقولها ..على أي بنت تعرفها أو ماتعرفهاش..تبقى مصيبة و لو ماكنتش تعرف إنها بتوجع..فالمصيبة أعظم من فضلكوا يا ريت تقاطعوا الكلمة دي اللي مايحسش بوجع اللي قدامه ..مايستاهلش انه يكون إنسان

البوست ده هيفضل هنا أسبوع و بعدين هشيله..مش عايزة نكد في المدونة ..بس بجد كانوا كلمتين محشورين في زوري و يا أقولهم ..يا اموت

هابي فلانطين
كل سنة وانتوا طيبين يا جماعة ..متأخرة شوية معلش ..هو انا يعني اش عرفني بمعاد البتاع ده؟
أنا كل اللي اعرفه اني مرة ماشية في الشارع لقيت دبايب دبايب..قلت جايز يا بت عيد الطفولة
أمشي في شارع الأقي الناس كلها لابسه أحمر في أحمر ..أقول ايه ده هو الأهلي هيلعب النهاردة..ربنا يقومك بالسلامة يا أبو تريكة
الاقى ناس كثير ماشية شايلة قلوب حمرا..أقول دول لازم بتوع حملات التبرع بالدم

فين و فيبين باه قاعده في امان الله في الشغل لقيتلكم مدام سندس-دي واحدة صيدلانية معانا بس متجوزة كلنا بنقولها يا مدام عشان هي تقريبا الوحيدة فينا اللي نالت الشرف ده-كانت قاعدة بتحكي لنهى -فاكرينها طبعاً-

دخلت ياختي الشقة لقيت النور مقطوع و الراجل منور شمعتين و حاطتهم ع السفارة و عينك ماتشوف الا النور قعدت أصرخ أصرخ..انت البعيد أعمى مابتفهمش ازاي تحط الشمع فوق مفرش السفارة انت مش عارف ده بكام مش كفاية بابا اللي جاييه على حسابه و الا عشان مادفعتش فيه حاجة ..آآآه مانت واخذي بالرخيص..لو كنا خليناك كعيت دم قلبك في العفش ماكانش ده اللي جرا

أول ما الإيتين يتوهوا عن بعض و عشان هيا فقرية هتديلو رنة ع الموبايل عشان
يكلما ..و عشان هو جلدة هتكبر في دماغه و يقوم باعتها "كلمني شكرا" عشان هي
اللي تتدبس في المكالماتو يا إما البت يا عيني تتدبس و تتصل يا إما تكبر في دماغها
و تحس انه معفن و ميت ع القرش و تعملوا ديليت من موبايلها و من حياتها
و تبقى دي قصة الحب التي فرقها نجيب ساويرس

طب فيلم البوستاجي ..حبكة الفيلم ان شكري سرحان بيقرأ جوابات البنت اللي بتحب
الواد و بعدين بتغلط معاه و لما جواب من جواباتها يتحرق و شكري بيقرأه الواد
ماييعرفش ان أبوها هيقتلها و ساعتها البت بتروح فطيس
طب لو بينهم ايميلات .كان الموضوع هيخلص على انه هيكتشف ان مافيش بنت ولا
حاجة وانه واحد صاحبة بيهرج معاه
يا إما كان هيروح يتقدملها و كانت القصة العظيمة دي إتفشكت بسبب مفتاح الأنبوبة
عليها والا عليه..فين العاطشفية بأه؟

حتى فكرة الفلانطين نفسها..مش هتبقى هيا هياها لو كل الناس اكتشفوا انهم كل سنة
بيحتفلوا بالذكري العطرة لجلوس أخونا القديس فلانطين و إعدامه جلوسا على
الخازوق
آه و النعمة هو ده العيد

و بعدين أنا بقيت حاسة ان كل الناس بتضحك على بعض
يعني بعد ماخرجت من الشغل قلت أما ألف كده على محلات الهدايا أتفرج من نفسي
..لقبت بنتين شكلهم كده من أصول ريفية ..واقفين بينقوا هدية

-بقولك يا به..أجييلوا القلب و الا الدبدو..؟
-لأ يا به..جنتك نيلة ..دبدو ..ليه ده رالاجن و هما الرجاله بيلعبوا بالدبادي..؟
-أصلي مش عارفة يا به..مش هارشة موضوع القلب ديه..ديه صغير قوي
- طب أقوولك ماتجيبيلوا الاتنين
- يا نايبتي..الاتنين..ليه يا به..هو انا كت هاتجوزه؟

أدي يا عم الفلانطين و اللي بيحتفلوا بيه
يا عم فكك بلا و جع دماغ

خالص و لو جابلي عريس هيبقى راجل محترم
مش انتوا رأيكوا كده برضه
أما أخش أتصنت عليهم و أحكيلكوا المرة الجاية
ادعولي

تابع السادس
أعذروني يا جماعة ..تأخرت عليكم

كان عندي ظرف..حزين..كئيب..يقبض القلب

فأنا و من مدونتي هذه أنعي إليكم بمزيج من الأسى و الأسف ..و بقلب يعتصره
الألم...و بنفس جريحة كسيرة دامعة..و أدعوكم للوقوف 56 دقيقة حداد على روح
الفقيد

الأصيل الصديق الصدوق المتحمل المخلص

الهارد بتاع الكمبيوتر بتاعي

ماستحملش يا عيني كل البوستات دي اللي انا باكتيها و باخزنها عليه

فضل يكتم في قلبه

يكتم في قلبه

لما طق من جنابه يا عيني

إهئ إهئ إهئ

مش قادرة يا جماعة مش قادرة

دموعي غرقت الكيبورد وبدأ يطلع شرار

ززرززرز

أي..ماتخافوش دي صدمة كهربائية على خفيف

و فجأة ماما مالمقتنيش قدامها
وقعت من وسط دراعتها و ربت تاني ع الأرض

يااادي النيلة

نيلة ايه بس يا بربر يا حبيبي

و هووب.. شالنتي من ع الأرض تاني

ده عريس بأه محترم محترم و الحكومة كلها وافقت عليه قبلنا

الحكومة كلها؟؟ليه؟؟ يكونش جيمي فرقع خديجة و رجع لعقله و هيخطبني ..و النبي
يا ماما ده أنا أبقى حنة سيده أولى؟ ... أوجه نشاطي الخيري كله للأطفال ضحايا
التفزيون المصري ..و الا أقولك لسواقين المكروباص ضحايا الحزام و الا
أقولك..الستات ضحايا عمليات الشفط

ايه يا بنتي حيلك حيلك جيمي مين و خديجة دي تطلع ايه؟؟ده جايبك عريس أهم من
كده بكتير

أهم من كده؟؟قصدك...سيادة ال...؟؟
يا بنتي هتودينا في داهية ..بصي طرطيلي ودانك كده..ايه أول حاجة تخطر على
بالك لما أقولك...ظابط شرطة

بوكس و قسم و عصاية مقشاة

عصاية مقشاة؟؟ يا بنتي باقولك ظابط مش كناس

و النبي يا ماما انتي طيبه ماعادتش فارقة دلوقت الأدوات دي بقت بتستعمل في
المهنتين

يا بت بلاش غلبة بأه..بقولك أونكل ديسكو جايبك عريس مايترفضش..ظابط و من
عيلة و متربي تربية عالية

يا سلام

و الله يا برايد يا حبيبي شكلها كده هتمشي المرة دي

ماما جابت لي الصينية الموعودة و دخلت بيها قام وقف على طول ..مؤدب و الله ..و
كان فاضله 3 سنتي و نص و يخطب في السقف..و ماله الطول هيبه برضه ..بعد ما
قاعدنا بأه بدأت المعاينة ..أنا طبعا راسمة الهدوء و باصة في الأرض و كل شوية
أضرب بجانب عيني كده و ألمحة ثانية أو إثنين ..لا و الله شكله من قدام الستارة أعلى
من وراها بكتير..مش حلو حلو يعني ..بس ملامح رجالي كده عليها مسحة وسامة
معقولة

هو بأه راشق عينه في وشوشنا كلنا ..كل أما حد يتكلم يتعدله كده و يبصله بصة
عميبيبيبة أوي ..ماما جت تتكلم إدير بصلها لقيتها فصلت في وسط الكلام و قامت
جري كأنها عاملة عاملة

بابا بأه جامد ..مش بقولكم بطل بلاي ستيشان..فضل و هو بيتكلم باصص للعريس و
هو باصصله .ده يبص و ده يبص ..برافو يا بابا ..إديلوا نظرات خليه يخاف ..بس
مين بابا يا عيني ماقدرش يكمل ماتش البص الدولي ده ..شوية و فصل زي
ماما..بابا صعب عليا صحيح بس برضه فرحت قوي بأخينا ده ..جامد جامد يعني ..و
الله كويس هي دي الحيلة اللي كنت بادور عليها من زمان ..حاجة كده الواحدة تتسند
عليها و تدخل في أي مشكلة و هيا قلبها جامد ..يا سلام هوده الكلام ..هو ده الـ..في
اللحظة دي رشقت عيونه في وشي..أي..و الله حسيت إن وشي وجعني ..طب أروح
فين و الا اعمل إيه..قلت أقوم أجري ورا ماما ..بس قلت عيب يا بت..لازم تثبتيله
برضه إن إنتي بنت جامدة"أنا مش بتاعت الكلام ده ..أنا كنت طول عمري
جامدة""..بس بس مش طالبة أغاني هو ده وقته
بصلي و فضل باصصلي ..و لأول مرة من أول ما قعد فتح بقه و إتكلم

إسمك إيه

برايد

ثلاثي

هه؟

إسمك ثلاثي مش فاكهة إسمك و الا إيه؟

فاكهة فاكهة..إسميبيبي..إسميبيبي؟..إيه؟..أونكل ديسكو..ماترد إنت

أونكل ديسكو مات على روحه من الضحك ..يا بنت يا عكروثة مش عارفة

إسمك؟..إسمها يا سيدي

رفع إيدته في وش أونكل ديسكو و خلاه بلع بقيت الكلام

أنا سألتها هيا..و المفروض هيا اللي ترد عليا

يا دي النيلة ..إيه الدهولة اللي أنا فيها دي..مش عارفة أتكلم ..و لسه هافتح بقي لقيته
مطلع حاجة بتلمع كده من جيبه ..يا حلولي يا حلولي ..خاتم ده و الا إسورة ..يا سلام

حاج ديسكو..ايه النظام ده؟
أونكل ديسكو و هو بيضحك
هههه..خير يا أبو برايد خير..ده راجل ليه هيبه و مالوش في الدلع..و مادام قال انه
هيتفق معايا يبقى ماتقلش مبروك مقدما
و هوب لف هو كمان و خرج

ماما ياعيني أعصابها ماستحملتش و إترمت على الكرسي و هيا بنتهج
أنا لا يمكن أوافق على الجوازة دي أبدا..يا لهوي ..ده إيه الرعب ده
جرى إيه يا ماما و إنتي خايفة من إيه..تكونيش هربانه من حاجة و خايفة تتقفشي؟
إمشي يا مهروشة إنتي ..يعني بتدافعي عنه..يا بنتي ده ممكن في أي خناقة يجرك ع
المعتقل إنتي ماشفتيش كان بيوصلنا إزاي
يا ماما حمش شوية بس
حمش؟؟..بكرة لو إتجوزك ده يكسر دماغك..يا بنتي ده بيفكرني بأحمد زكي في
زوجة رجل مهم
يا أم برايد أدينا هانستنا لما نشوف أخرته إيه ..بلاش نوقف إحنا المراكب السائرة و
خلينا ورا الكداب لباب الدار
هو ده الكلام يا بابا..شكله مش عاهة قوي..مش كل يوم هامشي عريس ..أنا عايزة
أخلص بأه
يا سلام ياختي؟؟..أما نشوف أخرتها معاكي إيه

طبعا أنا ليلتها ماجاليش نوم عماله أحلم بالظابط و اللجنة و النجوم اللي علي كتفه و
أنا و انا بمرمط في خلقالله وانا مسنودة بأه..و من كتر التفكير مانمتش غير بعد الفجر
بعد ماقت صليت الفجر و استغفرت ربنا و قلت خلاص يا رب مش هامرمت في حد
و لا هاكسر أي إشارة و هاكون مواطنة مثالية تلتزم بالقانون..بس طبعا نتيجة السهر
ماقدرتش أروح الشغل تاني يوم و قعدت في البيت و طول النهار ماما تبصلي و
تتنهد ..زي ماتكون بتقوللي اما نشوف هاتودينا فين وراكي

عدى اليوم على كده و تاني يوم رحت الشغل ..أول مادخلت من باب المستشفى عم
محمد الأشكيف البواب بتاعنا اللي كل يوم بيستقبلني بتلات أربع دعوات أول
ماشافني دير وشه الواحد التانية..خير اللهم أجعله خير ..يظهر المدام صبحته بخناقة
أو مسته على أنعام الشبشب أبو وردة..ماعلينا مانا مش هاقف أقرره و يشكيلي حاله

طبعاً ماما لما عرفت رقت بالصوت و اتصلت ببابا و جابته على ملى وشه و لما
حكته نزل عشان يجيب أونكل ديسكو من قفاه و أونكل ديسكو بعد ماخذ دش محترم
من بابا قرر عمل مؤتمر قمة و بعث جاب سيادة وزير الداخلية مستقبلاً
الحديث كله بيدور بيننا و احنا مولعين و بينه و هو أسقع من أطول لوح تلج قابلتوه
في حياتكم

إيه يا بني آدم اللي انت عملته ده
إيه عملت إيه
إنت باعت واحد من الآداب يسأل على بنتي في شغلها
عادي أمال يعني هانزل أسأل بنفسي أمال المخبرين دول لازمتهم إيه
هو انت بنتحري عن مجرم دي عروسة .. و بعدين مالاقيتش غير مخبر من الآداب
يسأل عليها و في شغلها
طبعاً ماهم مخبرين الآداب دول خبرة في السؤال عن البنات .. المخبر بتاع حضرتك
بأه من قسم المخدرات
يا سلام سلم إنت كمان بعث مخبر يسأل عليا شوية شوية تقوللي إنك بعث مخبر يسأل
على مراتي
طبعاً .. بس ده بأه تبع التموين
إنت يا بني آدم إنت بتستهبل .. إنت فضحتنا كلنا
يا عمي النار ماتحرقش مؤمن
يا عيني يا عيني ع العقل و الحكمة و انشاء الله التحريات اللي انت جمعتها دي
أثبتتلك إن إحنا مجرمين يعني هتيجي تجرنا ع القسم إمتى إنشاء الله
لا يا عمي لا .. التحريات أثبتت إنكم ماشاء الله لا غبار عليكم خالص و الفيش كمان
جاي نضيف خالص
أفندم؟.. فيش؟؟.. إنت إستخرجت الفيش بتاعنا و فتشت عليه
لا يا فندم و دي تيجي.. أنت عارف ان الفيش لازم يتجدد كل 3 شهور.. أنا عملتكم
واحد جديد
يا سلام و انشاء الله أخذتنا نعمل فيش و احنا مانعرفش .. خدرتنا يعني
لا يا عمي مانا عندي بصامتكم

بصينا لبعض
بصامتنا؟
أه.. من ع الولاة

عمر التفت لي و قاللي هيا بتعيط ليه؟
بصتله و ديرت وشي الناحية الثانية
هو فاكرني هاكلمه و الا ايه؟
هزلت

أنا شخصيا بقه ماكنتش محتاجة رقابة من حد ..كنت كفيفة بصد أي حد يتجرأ و يفكر
انه يكلمني

لو سمحتي يا دكتورة

نعم

ممکن أقولك حاجة

بخصوص الكيمياء الصيدلانية

لأ

الكيمياء العضوية

لأ

الكيمياء الحيوية

لأ

السموم

لأ

يبقى سوري مافيش كلام بيننا

و أرفع راسي بمنتهى الفخر و الإباء و انا سايباه واقف فاتح بقه زي عم عبدربه
البواب و هو بيتفرج ع المسلسل الكوري

و فضلنا ماشيين الخمس سنين على هذا الأساس و عيشناهم في سلام و امان و منتهى
التصالح مع النفس و ماكانش بيعكر صفو حياتنا غير اننا نسلم عن خبر اتنين من
الكابلز بتوع الكلية اتخطبوا

فاطمة عضوة الشلة بتاعنا كانت في الأيام دي بتبقى على وشك انهيار عصبي و
بتجلبها حالة قرقضة ضوافر و عض ع الصوابع من الدرجة الثالثة و مابتهداش و
تتظمن الا لما بتعرف ان الموضوع اتفرکش و بيبو فرقع جيبي او جيبي فرقعت
بيبو أو باباها فرقع فيهم الإنتين بعد ما عرف انهم بقالهم 5 سنين مدبلرين مع بعض و
مقرطسينه

و طوال كل السنوات دي كل اما أشوف فيلم عربي من اللي بتلاقي فيهم شلة من
تلات بنات و شلة من تلات ولاد و يقعدوا يحبوا في بعض و آخر الفيلم التلاتة دول

مش عارفة يا جماعة الموضوع ملخبطني .. طب فين الصح و فين الغلط ..طب انا
أعرف منين باه الغلط الغلط و الغلط اللي الناس بتخوفني بيه بس هما في الحقيقة
شايفينه صح

مجتمعنا بوشين و الا هي دي أسس التربية

يعني انا كنت صح و الا كنت معقدة و الا ايه النظام
أنا كنت باتكلم مع زمائلي عادي في حدود الدراسة..بس ماكنتش باسمح بالكلام يتعدى
الحدود دي..يمكن ماكانش أصلا فيه حد يوحى بالثقة ..أو يمكن انا اللي كنت خائفة
..مش عارفة بالطبط

عموما كده كده خلاص الجامعة عدت بحلوها و مرها..بس ادوني انتوا رأيكم ...من
أجل الأجيال القادمة

عن الرقة و الأنوثة

فاكرين فيلم غصن الزيتون؟ بتاع أحمد مظهر و سعاد حسني...لا طبعا مش الناصر
صلاح الدين هو ده كان فيه سعاد حسني؟

في الفيلم ده كان أحمد مظهر المدرس بتاع سعاد حسني و حبها و اتجوزها بس كان
شاكك ان فيه علاقة بينها و بين عمر الحريري اللي كان مدرس في نفس
المدرسة..طب ايه علاقة ده بأي حاجة يعني؟؟؟..هقولكم اصبروا بس

في مشهد من الفيلم ده كان عمر الحريري داخل قهوة فيها شوية مدرسين زمائله
قاموا

قالوله ايه الكولونيا الجميلة اللي انت حاطتها دي إسمها إيه
قالهم أنوثة...و بغض النظر عن الإسم السخيف..لأ..السخيف جدا لكولونيا أو بارفان
رجالي..فدي كانت المرة الأولى في حياتي اللي أسمع فيها الكلمة دي

أنوثة

و فضلت الكلمة دي متعلقة في ذهني بشكل عمر الحريري لمدة طويلة لحد لما كبرت
شوية و لقيت الناس بيستخدموها لوصف ناس تانيين مع الأخ عمر الحريري.. هند
رستم. مارلين مونرو . ليلي علوي و غيرهم و بدأت أدور حواليا في
المحيط بتاعي على حد يتوصف بالكلمة دي.. بصراحة مالفيتش

فين يا جماعة الأنوثة اللي بيقلوا عليها دي..مامتي طول النهار في المطبخ ..طنط
سهير جارتنا طول النهار و الليل بتغسل و تنشر الغسيل و الغسيل ينقط ع البلكونة
بتاعت طنط أمال..فطنط أمال بتتخانق مع طنط سهير عشان الغسيل اللي بينقط و
بتتخانق مع ابنا عشان يلعب في الشارع و سايب واجب الحساب

طب سيبكوا من الجيل ده ..خش ع اللي بعده منال بنت خالتي اللي أكبر مني بخمس
أو ست سنين ربنا كرمها من 4سنين و دخلت دنيا ..طيب يا منال انتي طول عمرك
حلوة كده و دلوعة و رينا الأنوثة بعد الجواز ..بعد الجواز بكام شهر هوب دخلنا ع
الحمل كعبرت و بقللت من كل اتجاه ..ما علينا بكره تولد و تفوق..و اذ بمنال اللي كنا
بنضرب بيها المثل في الرقة و الروقان بقت شبه الستات اللي بيطلعوا في إعلانات
السمنة و مساحيق الغسيل تصحى طول الليل عشان الواد بيعيط و طول النهار عشان
أبو الواد عايز ياكل و يشرب و مرتبها اللي كان ضايع كله ع البارفانات و المكياج
بقة بيروح في ثلاث إتجاهات..بامبرز ثم بامبرز ثم بامبرز..و طبعا نتيجة الصحيان
لمدة 24 ساعة في اليوم واضحة جلية على ملامح وشها و راسها يادوب تلمس أي
حيطة في أي مكان و نسمع شخيرها من الفضاء الخارجي

طب سيبنا من المفهوم ده ..خلينا في مفهوم ثاني برضه غريب عن المرأة المصرية

و

هو مفهوم الرقة

البنيت الرقيقة اللي تكلمها تبص في الأرض و تحس ان الهوا ممكن يجرحها و اللي تبقى حاسس انها بسكوتة ممكن لومشت شوية على رجليها تتكسر نصين.. يخطبها واحد من دول و يفضل كل اما يروح في حته يقول عليها شعر.. نسمة.. ريشة.. صوتها زقزقة عصافير و كل اما تسمع غنوة حلوة تفكره بيها.. و يعملها رنة ع الموبايل

لما النسيم بيعدي بين شعرك حبييتي باسمعه.. بيقول أهات
و عطورك الهادية اللي دايبه فيكي كل ماتلمسك بتقول أهات

يعزمها عالغدا ماتاكلش غير سلطة.. يجيبها هدية غالية تزعل منه و تقوله انت ليه مكلف نفسك.. و هكذا تستمر الحياة كحلم جميل يصحى منه إمتى؟

بعد الجواز ب 4 أسابيع أو اسبوع.. حسب حظه و نصيبه و تبدأ المطالب و يبدأ التغيير.. و فجأة يلاقي الحالة اتقلبت 180 درجة

لأن واحدة بالمواصفات دي تبقى لازم كانت عايشة في فقاعة بعيد عن كل الناس.. عمرها ما ركبت مواصلات.. عمرها ما اتعاكست و اضطرت ترد على واحد قليل الأدب و توقفه عند حده.. عمرها ماتعكملت مع حد في شغلها.. عمرها ما اضطرت تاخذ موقف و تتخانق علشان تاخذ حقها أو توقف ظلم وقع عليها.. عمرها ما نزلت السوق تشتري الخضار و اكيد عمرها ما طبخته فأكيد بعد الجواز لو بدأت تعمل الحاجات دي كلها.. لا يمكن تفضل نفس البنيت الرقيقة البسكوتة اللي بتنجرح من الهوا.. و الا مش هتقدر تعيش

طبعاً الحالة بتزيد أكثر و أكثر مع وجود الأولاد و اللي غالباً عبء تربيتهم بالكامل بيبقى على كتافها هي و بس.. فيا إما تبقى شخصية قوية و تخوف العيال وأبوهم.. يا إما العيال هتنبوظ و تفسد و ساعتها كل الناس هيلوموها هي و بس

فيا عزيزي الزوج..ماتزعلش لو عروستك اتقلبت لشخص تاني بعد الجواز ..مافيش
قدامها غير كده..ما هو انت لو بذلت شوية مجهود و ساعدتها يبقى عندها شوية وقت
تفوق لنفسها

و يا عزيزي العريس دور ع التربية و الأخلاق و التدين أولا ماتركزش بس على
الرقعة
و الأنوثة ..لأن الأيام بتغير هذه الحالات الطارئة

و اللي محتاج أنوثة تدوم معه مدى الحياة...يسأل على إزارة كولونيا من بتوع عمر
الحريري

..بس حتى دي ..مافتكرش لسه بينتجوها

السابع
أسوأ جزء من أجزاء يومي..لأ ..من أسوأ الأجزاء-لأن المنافسة مشتعلة و مش قادرة
احدد أي جزء أسوأ من الثاني- المهم و بفارق ضئيل يتصدر القائمة ..رحلتي من
باب الشقة الى بوابة العمارة .و بالعكس
لأنني في الرحلة اليومية دي غالبا بقابل كل فرد من أفراد جيراني الأعزاء

الجيران عموما ممكن يشكلوا جزء كبير من حياتك و ممكن يكونوا مالمهمش أي أهمية

أنا بأه جيرانني من النوع ..العشري..الحنين..المهتم..المواسي..باختصار يعني..ناس لا تطاق

..

بيحبوا يعرفوا و يتدخلوا في كل تفاصيل حياتي و بيحققولي توازن كبير في حياتي اليومية-ايه ده مين اللي فتح التلفزيون؟-لأن مافيش انسان طبيعي بيعيش حياته في حالة مستمرة من التفاؤل و السرور-ايه؟..أيوه أنا متفائلة ..فيه حاجة؟- لازم يبقى فيه جزء كده نكد مطعم بحرق الدم و لازم يبقى فيه نص كباية فاضي يوازن نص الكباية المليون و الا الكباية ممكن تتدلق عليك و تغرقك و الناس تفتكر ك عملت...والا بلاش..نرجع لموضوعنا

الرحلة اللي ممكن تستغرق دقيقة واحدة من باب الشقة للسلم ممكن تمتد كل يوم لحد ربع ساعة كاملة..و تمر الدقايق ببطء و أحس ان فيه حاجة ثقيلة كابسة على مراوحي و مش قادرة أنففس زي ماكون باتفرج على معتز الدمرداش و الا تامر أمين...الستات يوقفوني و يفضلوا يبوسوا فيا و يممصوا شفاههم

ربنا يعدلهاك يا حبيبتشي
معلش مابقعدش غير بنات الناس
هو انتي لسه
لسه برضه
مافيش أخبار؟
لسه؟
لسه؟

طبعا مفهوم ان أكثر 3 حروف باكرهم في اللغة العربية- اللي مش فاكرة فيها كام حرف- هما اللام و السين و الهاء

يوميها لسه بانزل على طرايف صوابعي عشان ماحدث يحس بيا و هوووب
..اتفتح باب شقتهم و عقلي قاللي يا بنت اركبي الدرايزين و اعلمي "سكي" لغاية
البوابة..بس ..لأ..لأ..لأ..أنا دكتورة محترمة و لو حد شافني أعمل ايه ان شاء
الله..المهم حصل اللي كنت خايفة منه و لقيت أماني جره في ايدها هند و قدامها بطنها
فيها مؤمن واضح انه نايم جوه باطنها على ضهرة و حاطت رجل على رجل لأن
بطنها كانت واخده شكل شبه المنحرف

امشي يا بنت بأه جنتيني..هلاقيها منك و الا من اخوكي..الله برأيد ازيك يا حبيبي
أهلا يا أماني عاملة ايه
البنات مجناني و الواد محجر و مش راضي ينزل..على سيرة التحجير..مافيش عندك
أخبار جديدة؟

بلعت الإهانة بمزاجي..ماعنديش وقت أخش في حوارات
ربنا يسهل يا أماني..عن إذتك
استني بس..ماهو لو ماكنتيش نشفتي راسك و كنت و افقتي على أخو فوفو..مش كان
زمانك زيي كده دلوقت
نصيب يا أماني بأه ..هنعمل ايه؟
على رأيك خيرها في غيرها فوفو لسه مكلمني على واحد انما ايه..زي مانتني عايزاه
بالظبط
ماظنش

يا بنتي بس خليكي متفائلة..ده ايه أخلاق و دين و مايفوتش فرض..هو فوفو ماكانش
موافق في الأول عشان موضوع زمان..بس أنا ضغطت عليه
بصيت لمنظرها
..ضغطتي عليه؟ و لسه عايش

ههههههه..يوه يا برأيد دمك خفيف يا مضروبة..ايه رأيك الخميس كويس؟..كويس
أنا حاجيبه هو و العيلة ..و انتي ابقني البسي حاجة حلوة كده و بلاش مكياج..أنا قلت
لك ده متدين

ياريت برضه لو انتي و الأستاذ فوفو جايبين انتوا الإتنين كمان تخللوا بالكوا من
موضوع الماكياج ده
هه؟..ماشي ماشي..بس باقوك ايه ماشي أمورك بأي يا حبيبي مش عايزين حد
يشمت فيكي أكثر من كده
أكثر من ايه؟

ماتشغليش بالك..ههههه..الناس مابترحامش
على سيرة الناس اللي مابترحمش ..ازي مامتك؟
هه؟..حلوة حلوة..بتسلم عليكي
الله يبسلها و يديها على أد نيتها
ان شاء الله..وربنا يقدملك الخير يا حبيبي..باقوللك ايه شيليلي بأه البنات لحد البوابة

آآه..هانبتدي حاجة قصاد حاجة
حاضضضضر..يا أمانى..و ماتنسيش تبقي تسلميلي ع الأستاذ فوفو..و تقولي لأخوة
ياريت مايقاش لسه زعلان
لولو؟!..ده لولو ده عسل و قلبه أبييض مايشلش جوه قلبه خالص
ده انتي لو كنت اتجوزتية كان زمانك عايشة في سعادة مابعدھا سعادة
و هو صحيح عمل ايه في قضية الشيكات بتاعته؟
خير ان شاء الله
و محضر السكر؟
ربنا يسهل
وقضية التحرش؟
ربنا يزيع عنه
وقضية الخلع اللي مراته رافعاھا
ربنا ينصره ..بس باقوللك ايه ما هو ممكن برضه لو خلعتھ بيقى فيه نصيب و ربنا بأه
بيقى قاسمكم لبعض
تفتكري؟
آه و الله ممكن. و ليه لأ

سؤال وجيه فعلا

عموما من خبرتي الحياتية الطويلة ما حكمش على العريس من خلال الواسطة ..مانا
طول عمري بيجيلي عرسان عاهات عن طريق ناس زي الفل..طنط حشرية و أونكل
ديسكو و غيرهم
ما تقاطعش يا بت يا برايد..مش هتخسري حاجة...

.....

..

يمكن

تابع السابع

يا أرضنا العطشاااااااا نرويها بدماءاااااااا..@##*##شقاااااااا..تصبح بالخير ماليانة

لقيت نفسي اليوم الموعود بادندن الأغنية الرومانسية دي في دماغي..هي أغنية
رومانسية وحنونة جدا بس اللي ضايقتني إني ناسية كلماتها.و ده خلاني
أتشائم..حاولت أدور جوه مخي على مطلع أغنية تانية رومانسية من بتوع مطربتي
المفضلة الساحرة الرقيقة شفيقة..ما أسعفتنيش الذاكرة
المهم في الآخر استقرت في خلايا المخ الرمادية بتاعتي أغنية رومانسية رقيقة

دقيقة حداد..دقيقة حداد..دقيقة حداد

ارتحت للريتم الشجي ده و ابتديت أستعد لليوم الموعود
خرجت هدومي كلها من الدولاب و بدأت أدور على حاجة ألبسها

أنا مش مناقفة..لايممم
تدليس نفاق كذب..بس يعععععني.مش هنخسر حاجة لو وقفنا على أرض محايدة
..شديبيت الطقم الأحمر..إخصصص أحمر و العياذ بالله لالا..و بعدين لحسن يطلع
زمالكوي زي البيه الأولاني و بعدين دول بدأوا يكتروا في البلد اليومين دول

طب الطقم الفوشيا...لا والا فوشية ايه ..ده اسمه لوحده ممكن يخليه يقيم عليا الحد

طب نخليه الأصفر..لالالا..لون خليع الأصفر ده..بلاشه
و فضلت أطلع لون ورا لون و طقم ورا طقم بس مارتحتش نفسيا لأي حاجة منهم

آآآه..و أخيرا..لقيت في أرضية الدولاب حاجة كده بيضه منفوشة..آه..دي يا إما
الشمسية بتاعة جدتي يا إما الباراشوت اللي عمي نط بيه في حرب أكتوبر..مين اللي
بيقول ماكانش فيه باراشوتات في حرب أكتوبر؟..انتوا هتفهموا أكثر من عمي؟..هو
بنفسه أكدلي انه نزل بالباراشوت في سينا في 6 أكتوبر 74 و مادام قاللي كده يبقى
لازم أصدقه أمال هيشغلني يعني؟..مرت عليا لحظة من الفخر بعمي و بطولاته اللي
واحدة منهم اتعملت فيديو جيم بيلعب بيها بابا و أونكل ديسكو كل أسبوع..و قررت
اني بشوية دبائيس على حبة غرز هيكون ده هو الزي المناسب اللي أدخل بيه ع
العريس المنتظر أبيض في أبيض..لون حيايدي و بعيدن فيه فرصة كبيرة ان
الموضوع يمشي لأن الباراشوت ده زي ماعمي قاللي جالب للحظ و اللي يلبسه لا
يمكن يجراله حاجه وحشة زي ماحصله و هو نازل ع الحدود و 4 اسرائيلين كانوا
بينشئوا عليه و قعد يرقص في الرصاص يرقص في الرصاص و نزل سالم غانم
فوق السطوح

مديت إيدي على علبة الماكياج و بعدين سحبتها أسرع ماباسحب المرتب من إيدي
الأستاذ رزق أول كل شهر..و قررت أعمل بنصيحة أمانى و ماحطش ماكياج .. ده
قرار صعب جدا لواحدة زيي لا يمكن تخرج من أوضتها من غير التظييط اليومي
زي ماقلت أنا لا يممم
ماكياج على الأقل هيريح بشرتي شوية
خرجت من أوضتي عشان أبدأ في موال التنضيف بتاع كل مرة..و في نص الصلاة
لقيت بابا اللي كان شايل في ايده كباية شاي و جرنال

صباح الخير

صباح النور

فيه حاجة جديدة في الجرايد؟

أكيد فيه..انتى مستننية حد؟

لأ عادي

أمال رايحة فين؟

رايحة أنصف مع ماما

إيه ده هي مامتك هناكمان؟

أمال هتروح فين؟

و ناويين تقعدوا معانا كثير

بابا..فيه ايه؟..دي مبادئ الزهايمر والا ايه؟

بابا..بابا مين؟

و قربلي و دقق قوي في وشي

انتى مين؟

بابا..انا برايد..مش عارفنى

برايد؟..برايد؟..آه برايد..ايه اللي انتى عامله في نفسك ده؟..انتى حاطه ماكياج والا

ايه؟..شكلك غريب قوي

آه معلش أصلي باجرب نوع جديد

الحمدلله ان العريس ده ماشافنيش قبل كده ربنا بس يستر و أمانى و فوفو مايفتحوش
بقهم

و بعد كورس التنضيف و تظييط الباراشوت البطولي على مقاسى مع ترك خطوطه
الأساسية ووسعه زي ماهو..ضرب جرس الباب..بابا فتح الباب و لقا قدامه شخصين
مايعرفهوش

بعد شوية مقاومة و انكار و محاولات إقناع ..اقتنع بابا أخيرا ان دول امانى و فوفو و
هز راسه و هو بيقول

مش عارف الناس شكلها بيتغير كده ليه؟..انا لازم أغير النظارة

دخلت الصالون معايا صينية الجاتوه المعتاده و قعدت أبص ع اللي قاعدين

اماني و فوفو دول؟!.. غالبا آه أنا عرفتهم من الهدوم هما كانوا مستغربين شكلي بس
مش أد استغرابي لشكلهم و خصوصا فوفو
يا حلاوة.. ده طلع شبه الرجالة أهه ده حتى فيه مبادئ شنب يحاول جاهدا إثبات
ذاته.. لكنه للأسف الشنب المناسب في المكان غير المناسب.. و بين فوفو و أماني
لمحت هند الصغيرة بتنقل عينيها في رعب بين مامتها و باباها بنظرة عجيبة كأنها
طائر من طيور البطريق نام في القطب الشمالي و صحي لقه نفسه في بنها.. مسكينة
البنيت أكيد جاتلها صدمة عصبية و تلاقيها فاكرة انها مخطوفة.. صعبت عليا
المضروبة

مش وقته يا بربر.. خلينا في المهم وطيت راسي و بصيت في الأرض.. و هي الحركة
اللي بقالي 3 ساعات بتدرب عليها. انا عمري ماوطيت راسي لحد.. أو لا
لأني.. عمري مادخل قسم.. ثانيا لأنني أحب أبص في عين اللي قدامي وانا باكلمه.. أنا
ماباغيرش نظامي.. بس يعععني كان نفسي من زمان أدقق في لون السجادة بتاعنا

طب و الله سجادة حلوة يا جماعة فيها أزرق و أحمر و.. ص.ب.48... لأ ده مش عنوانا
البريدي مكتوب على السجادة.. ده اللي العريس كان لابسه في رجله.. صندل بني
شكله مقاس 48.. آآآه.. جاتلي قفلة في النفسية متمركزه في العمق العاطفي... صندل يا
برايد؟!.. هي حصلت؟!.. تتجوزي واحد لابس صندل.. بس لأ.. مش حنهبكها بأه.. أنا في
المرحلة دي مستعدة أتجوز أي كائن متعدد الخلايا مادام هينشطني من فترينة
الجواز.. مش مشششششكلة الصندل.. نبقى نغير هوله مش مشكلة هما صحيح بيقلوا
الراجل ببيان من جزمته.. لكن ده طبعا كله كلام قديم وأنا لايمكن أعمله اعتبار
خصوصا في هذه المرحلة الإنتقالية الحرجة.. طلعت بنظري لفوق لفوق لفوق.. كويس
لابس بدلة و كرافته.. بس فين راسه؟؟؟؟.. راسه فين؟؟.. أنا ممكن اتغاضي عن أشياء
كثير.. لكن ياربي أتجوز عريس من غير راس. قعدت أدقق قوي أدقق قوي و فجأه
لمحت حاجة بتلعب كده.. ياسلاام دي عينين شخص.. آه و الله عينين شخص بتلعب
أهه؟!.. بس فين بقيت الأجزاء.. الفم و المناخير مش شايفاهم.. دماغ العريس كانت
عبارة عن كورة كبيرة من الشعر طالعها عينين.. شعره بحواجه بدقنه بشنبه كلها
عبارة عن شريط واحد سميك من الشعر ملفوف باحكام عجيب حوالين
دماغه.. يفكرك بالإنسان البدائي اللي كانوا بيدرسهولنا في التاريخ.. لدرجة اني تخيلت
انه هيقوم يشدني من شعري و يسحبني منه وراه ع الكهف.. بسسسسسس يا
برايد.. اهمدي و اتهدني.. دقن ايه و شنب ايه اللي هيبوظوا جوازه؟!.. اعقلي كده و ارسي
و بعدين و مالوا يعني الشعر الغزير مش أحسن من العكس؟!.. بس بس ماتبقيش خايبة
مانتي قدامك أماني أهه مثل عظيم عن التنازل عن كل حاجة من اجل تكوين شركة
لتربية العيال.. هي دي قمة التضحية من أجل الأجيال القادمة

على جانبي العريس لقيته جايب اتنين من اخواته واحده منشكحة ع الآخر صفين
اسنان طالعلم واحده ست و الثانية واضح انها جاية غصب عاها..بتبصلي بغل كأني
لسه مسلماها فاتورة التليفون..آآه أنا عارفة النوعية دي..يا إما لسه ماتجوزتش و
شايفه ان أي جوازة بتحصل على وجه الخليفة إهانة شخصية في حقها-بتفكرني بحد
بس مش مركزة مين- يا إما متجوزة جوازة تعيسة و مستخسره أخوها الحيلة في أي
واحدة يسعدها
أنا مالي و مالها..دع الخلق للخالق..أنا لا يممكن أسمح لأي حاجة تبوظ الجوازة
دي..كفاية بأه

العريس ابتدى يتكلم من مكان ما في منتصف نص وشه اللي تحت

بص يا عمي..احنا ناس نحب ندخل البيوت من أبوابها ..و احنا سمعنا كلام كتير
كويس عنكم من الأستاذ عبد الفتاح
من مين؟
الأستاذ عبد الفتاح
مين الأستاذ عبد الفتاح
ده

و شاور على فوفو اللي للحظة بص وراه
مين؟ آه..أنا..أنا
أحنا طبعاً مانعرفوش بطريقة مباشرة لكن الأخ عماد صديقه يبقى ابن عمي و سمعه
بيشكر فيكوا جدا..و انا عن نفسي مستعد لكل طلباتكم ان شاء الله

ماما اتدخلت
على طول كده..مش الأول تقعد معاها و تعرفها
إبيبيبيبييه؟
ده الثنائي المرح بيصرخ في صوت واحد و هما بيخبطوا على قفصهم الصدري اللي
قرب يتكسر
أ..أ..أنا قصدي يعني عشان التعارف وكده

يا حاجة احنا مانعرفش الحاجات دي احنا اهم حاجة عندنا الأصل

اتكيفت انا من الكلمتين دول..من غير قعاد بأه و كلام مالوش لازمة و بص تاني في
الأرض لما رقبتي هنتكسر
عمياني كده ..يمكن هو ده اللي يجيب فايده

أيوه بس الأول نتعرف أكثر على شخصية حضرتك..يعني احنا مش من الناس اللي

بتحب التزمت قوي

و مين يحبه؟

يعني من ناحية شغلها

دي مهنة سامية مافيهاش أي مشكلة

(والا كنت اعرف)

زيارتها لأهلها

طبعا دي صلة رحم

خروج وفسح

طبعا أنا عن نفسي أحب الخروج طالما في اماكن محترمة

التلفزيون و النت

طالما أنا واثق في عقلها اللي سمعت عنه كثير يبقى أكيد هاثق في اختياراتها

(ايه الحلاوة دي ..ده عريس فول أوبشان يا جدعان)

طب و بالنسبة يعني للماديات

أنا و الحمدلله عندي شقة كبيرة 4 أوض و ريسيشان كبير و جاهزة من كل شئ

ده شئ كويس جدا..يعني ان شاء الله لو فيه قبول.. يعني حاجات بسيطة بس اللي

هنتشرى

لا لا القبول مضمون ان شاء الله

(ياواد يا ثقة)

و ان شاء الله مافيش أي شئ هحتاج نشترية

أيوة بس يعني العفش و الأجهزة

لااااا..و لا حتى دول..الشقة فيها كل شئ

ماخلاص بأه يا أم بر ايد..الأستاذ واضح انه شارى كل حاجة جديد في جديد..هنطلب

ايه أكثر من كده..بعد القبول ان شاء الله

لا لا..القبول مضمون ان شاء الله

(ثقة لا تززع)

و الأجهزة مش جديدة قوي يعني

ماما ابنتت تزوم

أه عادي..يعني عازب بأه و كده و استعمل حاجات بسيطة استعمال بسيط

لا..الحقيقة المسألة مش كده

أمال ايه يعني..انت شارى كل حاجة مستعمله

لا لا..حاشى الله..انا برضه اعمل في بنات الناس كده؟

أمال ايه يعني الموضوع

في اللحظة دي سمعنا صوت انذار عربية

دي تقريبا عربييتي ممكن أطلع البلكونة أظفي الإنذار
أه طبعا اتفضل

و طلع العريس و معاه بابا و راه جري فوفو و أماني جريين و راهم هند عايزين
يطقسوا و يشوفوا نوع العربية ماما قامت تجيب حاجة ساقعة و فضلت أنا و الأختين
الحلوين في الصالون لوحدنا

و فجأه أخته اللي كانت منشكحة قوي دي ابتسامتها راحت في لمح البصر و بصتلي
نفس البصة بتاع أختها التانية.. انا كشيت في مكاني و ارتعدت فرائصي-الجماعة
بتوع النحوي لو سمحتوا بيقوا يقولولي فرائصي دي اللي هي ايه- قاموا الأثنين و جم
نحيتي

يا ماما!!!!!! قاموا قعدوا جنبي زي أسدين قصر النيل واحدة ع اليمين و الثانية ع
الشمال وكل واحدة استلمتلها و دن و وطت على و دني عشان تقرمها

لأ ماعضونيش بس همسو في و دني بصوت واطيبيبي
بلاش الجوازة دي أحسن لك
مش هاترتاحي إحنا عايزين مصلحتك
تبيه مش زي تيبك و مش هتنتفقا
ده غير ان احنا لا يمكن نسمله يتجوز دكتور
انتي عايزة تيجي تعمليلنا فيها بنت بارم ديله
بص أنا بابايا مالوش ديل
هش.. وطي صوتك
مخك في راسك تعرفي خلاصك
في اللحظة دي دخلوا الباقيين و انقلب الهمس لأحضان و بوس
يا حبيبتيش أنا حبيتك قوي
و الله دانتي هتبق عروسة تجن
داحنا هنشيلك على كفوف الراحة

الكلمة الأخرانية دي ماعجيبنيش ماما اللي كانت شايفاني باستغيث بيها عن طريق
التخاطر العقلي الأثيري

ايه ده؟.. هو انت شقة حضرتك في بيت العيلة؟
لا لا لا.. أنا شفتي بعيدة عن بيت العيلة انا عارف الموضوع ده حساس لناس كثير
يا أم برايد و ايه يعني حتى لو في بيت العيلة.. ده الراجل شكله من عيلة محترمة و
أصل طيب حتى باين ع الأنسات
أنسات.. أنسات مين دي كل واحد فيهم عندها 3 عيال

آه نسيت أقولكم اللفة اللي العريس كان جايها معاه في أول مرة كان فيها ايه؟...

قرص مشبك و نص كيلو بسبوسة على هريسة.....و 3 صوابع جلاش

Brought to you by:

AmirEleslam@DuD4Arab.COM

ENJOY IT

